



册府元龜
卷之五十九
至六十一

1 3
849
22



門 1 3
849
22



册府元龜

正其規尺者師也而善於其日
典禮令玉以事財者或對禮 淮南李嗣京叅閱

衆益善貴以爲三法一入於 西極文翔鳳訂正

鄭高帝二年請曰魏東其年正 豫章黃國琦較釋

帝王部 五十九

與教化 蘇書曰庶不惠然不辯誠志也

先王作教化民扶世道俗所以厚人倫端王政也莫
不因其自然率其不及使天下敦本而興行回心而
嚮道猶水之有源風之偃草也然而教化之流非可
家至而人說也故因父子兄弟之親教之以孝弟本

上下長幼之序勗之以慈惠夫婦之際化之節義農桑之功勉以勤苦故舉孝以為民極察廉以為民表或賜帛以敦獎或給復以令養是乃張四維明五教示大順建至治使民德歸厚風俗丕變不疾而速不嚴而化者繇斯道也書曰惠不惠懋不懋勉之之謂也詩曰爾之教矣民胥效矣其在是乎

漢高帝二年詔曰歲舉民年五十已上有脩行能帥眾為善置以為三老鄉一人擇三老一人為縣三老與縣令丞尉以事相教勿復繇戍

惠帝四年正月舉民孝弟力田者復其身

文帝十二年三月詔曰孝悌天下之順也力田為生之本也三老眾民之帥也廉吏民之表也朕甚嘉此

二三大夫之行令萬家之縣云無應令無孝弟力田之人可應察舉之豈實人情是吏舉賢之道未備也其遣謁者勞

賜三老孝者帛人五疋悌者力田二疋廉者二百石以上率百石者三疋自二百石以上每百石加三疋及問民所不便

安而以戶口率置三老孝悌力田嘗員計戶口之數以率之增置令各率其意以道民焉

武帝建元元年四月詔曰古之立教鄉里以齒朝廷以爵扶世導民莫善於德然則於鄉里先耆艾奉高

年古之道也六十四日者今天下孝子順孫願自竭盡

臣承其親外迫公事內乏資財是以孝心闕焉朕甚

哀之民年九十已上有受粥之法給米粟以為糜粥為復子

若孫令得身帥妻妾遂其供養之事

元光元年十一月初令郡國舉孝廉各一人孝謂善事父母

者廉謂清潔有廉隅者

元朔元年十一月詔曰深詔執事與舉孝廉庶幾成

風紹休聖緒今或闔郡而不薦一人其與中二千石

禮官博士議不舉者罪有司奏議曰不舉孝不奉詔

當以不敬論奏可

元符元年十二月詔曰朕喜孝悌力田其遺謁者

行天下賜孝者帛五疋悌者力田帛人三疋

昭帝元鳳元年三月賜郡國所選有行義者涿郡韓

福等五人帛人五十疋遣歸詔曰朕閱勞以官職之

事其務行孝弟以教鄉里令郡縣常以正月賜羊酒

有不幸者賜衣被一襲祠以中牢

宣帝本始元年遣使者持節詔郡國二千石謹牧養

民而風德化

地節三年十一月詔曰朕既不逮導民不明反側晨

興念慮萬方不忘元元唯恐羞先帝聖德故並舉賢

良方正以親萬姓歷載臻茲然而俗化闕焉傳曰孝弟也者其為仁之本與其令郡國舉孝弟有行義聞於鄉里者各一人

四年二月詔曰導民以孝則天下順今百姓或遭衰經凶災而吏繇事使不得塋傷孝子之心朕甚憐之自今諸有大父母父母喪者勿繇事使得收斂送終盡其子道

神爵四年四月以潁川太守黃霸治行尤異賜吏民有行義者爵人三級力田一級貞婦順女帛

元帝初元元年四月詔賜孝者帛五疋弟者力田三

疋

五年四月賜孝者帛人五疋悌者力田三疋

永光二年二月詔賜孝悌力田帛有差

建昭五年三月詔賜孝悌力田帛

成帝建始元年二月賜孝悌力田帛各有差

三年三月賜孝悌力田爵二級

河平四年正月賜孝悌力田爵二級

鴻嘉二年三月博士行鄉飲酒禮

綏和元年二月賜孝悌力田帛有差

哀帝即位賜孝悌力田帛

平帝元始元年二月班教化禁淫祀放鄭聲六月復
貞婦鄉一人鄉一人取其最尤者

後漢光武建武三年以伏湛為司徒湛奏行鄉飲酒
禮遂施行之

明帝以中元二年二月即位四月賜孝弟力田爵人
三級

永平二年三月郡國縣道行鄉飲酒禮於學較

三年二月賜天下孝悌力田爵人三級

十二年賜天下孝悌力田爵人三級

十七年五月賜天下孝悌力田爵人三級

章帝以永平十八年八月即位十月賜孝悌力田爵
人三級

建武三年三月賜天下孝悌力田爵人三級

四年四月賜孝悌力田爵人三級

元和二年二月乙丑帝耕于定陶詔曰孝悌淑行也

力田勞勤也國家甚體之其賜帛人一疋

和帝永元八年賜天下孝悌力田爵人三級

十二年三月賜天下孝悌力田爵人三級

竊帝以元興元年十二月即位賜天下孝悌力田爵

人三級

安帝永初二年詔居鄉里有廉清孝順之稱才任理人者國相歲移名與計偕上尚書公府通條令得外

補移書也
調選也

三年正月賜孝悌力田爵人三級

五年閏二月詔至孝與衆卓異者遣詣公車

元初元年正月賜孝悌力田爵人三級

三年十一月初聽大臣二千石刺史行三年喪文帝
道詔

以日易月於後大臣遂以
爲嘗至此復遵古制也

六年二月詔賜貞婦有節義穀十斛甄表門閭旌顯

厥行

延光元年二月賜孝悌力田爵人三級

順帝永建元年詔賜孝悌力田爵人三級

四年正月賜孝悌力田爵人三級

陽嘉元年正月詔賜孝悌力田爵人三級

桓帝建和元年正月詔賜孝悌力田爵人三級

魏陳留王咸熙元年令諸郡中正月六條舉淹滯一

日忠恪匪躬二日孝敬盡禮三日友于兄弟四日勞

身潔謙五日信義可復六日學以爲己

晉武帝泰始三年十月詔聽士卒遭父喪者非在疆

場皆得奔赴

四年班五條詔書於郡國一曰正身二曰勤百姓三曰撫孤寡四曰敦本息末五曰去人事

六年十二月帝臨辟雍行鄉飲酒之禮詔曰禮義之廢久矣今乃復講肄舊典賜太嘗絹百疋承博士及學生牛酒咸寧三年復行其禮

惠帝元康九年臨辟雍行鄉飲酒之禮

後魏孝文太和十一年冬十月甲戌詔曰鄉飲之禮廢則長幼之叙亂孟冬十月民間歲隙宜於此導以德義可下諸州黨里之內推賢而長教其里人父慈子孝兄弟順夫和妻柔不率長教者具以名聞

後周武帝天和元年詔諸有三年之喪或負土成墳或寢苦骨立一志一行可稱揚者仰本部官司隨事言上當加吊勉以勵薄俗

隋高祖開皇九年詔曰往以吳越之野羣黎塗炭干戈方用積習未寧今率土大同含生遂性太平之法方可流行凡我臣僚澡身浴德開通耳目宜從茲始喪亂已來緬將十載君無君德臣失臣道父有不慈子有不孝兄弟之情或薄夫婦之義或違長幼失序尊卑錯亂朕為帝王志存愛養時有臻道不敢寧息內外職位遐邇黎人家家自脩人人克念使不軌不

法蕩然俱除兵可立威不可不戢刑可助化不可專
 行禁衛九重之餘鎮守四方之外戎旅軍器皆宜停
 罷世路既夷羣方無事武力之子俱可學文人皆甲
 仗悉皆除毀有功之臣降情文藝家門子姓各守一
 經令海內翕然高山仰止京邑庠序爰及州縣生員
 受業升進於朝未有灼然明經高第此則教訓不篤
 考課未精明勅所繇降茲儒訓
 湯帝大業八年四月詔孝弟力田義夫節婦並加旌
 典表其門閭

唐高祖武德元年五月卽位詔孝子順孫義夫節婦

旌表其門閭孝弟力田鰥寡孤獨量加賑卹

四年七月詔孝子順孫義夫節婦所在詳例旌表其

門閭

太宗初卽位詔節義之夫貞順之婦州閭列上旌表

門閭

貞觀三年四月詔孝義之家各賜米五石

四年十月詔孝子順孫義夫節婦隨事褒顯旌表門

閭

六年詔天下牧宰每年親率長幼行鄉飲酒之禮

十三年正月詔孝子順孫義夫節婦咸表門閭

十七年四月詔孝子順孫義夫節婦賜物有差
高宗永徽元年五月辛亥詔曰通喪下達聖哲貽訓
締俗經邦咸率茲道至於嬰蓼莪之巨痛懷顧復之
深慈得自天經含生罔極者也爰自周餘七雄交爭
逮乎漢末三方競峙金革亟動鉦鼓日聞先王典章
掃地將盡遂令三邊武猛墨紵而扈戎麾七萃驍雄
素冠而事巡警亦有內無繼體傍闕同氣几寔安寄
奠酌不親迺睠於斯再深警歎朕膺茲景命君臨九
野中區富教外俗承規宜有解張以勵風俗衛士掌
開幕士等遭喪令期年上者宜聽終制三年

六年正月詔孝子順孫義夫節婦咸表門閭
顯慶二年三月詔曰如聞公主出適王妃作嬪舅姑
父母皆降禮答拜此乃子道云替婦德不修何以式
序家邦儀刑列闔自今已後可明加禁斷使一依禮
法若更有以貴加於所尊者令所司隨事糾聞
乾封元年有事於泰山詔孝子順孫義夫節婦表其
門閭終身勿事
永淳二年十二月詔孝子順孫義夫節婦表其門閭
終身勿事
中宗神龍元年九月詔曰在外百姓婚娶之家百兩

未行二親俄殞停哀之際便卽成婚遂輟苴經之容
敢伸花鬘之禮寧戚之心安寄罔極之心闕如敗俗
傷風莫過於此自今已後宜卽懲革
睿宗唐隆元年七月制鄉飲之禮爲日已久宜令諸
州每年遵行鄉飲之禮
玄宗開元十一年封泰山禮畢詔孝子順孫義夫節婦旌
表門閭終身勿事

十七年四月謁乾陵禮畢詔孝子順孫義夫節婦旌
表門閭

二十年十一月詔孝子順孫義夫節婦旌表門閭終

身勿事

二十三年正月籍田禮畢詔孝子順孫義夫節婦並
旌表其門

天寶元年正月改元詔曰如聞百姓之內或有戶高
丁多苟爲規避父母在乃別籍異居且令州縣勘會
其一家之中有十丁已上者放兩丁征行賦役五丁
已上者放一丁卽令同籍其居以敦風化
三載十二月制曰自古聖王皆以孝理天下五嘗之
本百行莫先行移於國則忠於長而爲順有天下孝
行過人鄉閭欽伏者宜令所繇郡縣長官具以名薦

其有父母見在別籍異居虧損名教莫斯為甚親歿之後亦不得分析自今已後如有不孝不恭傷財破產者宜配隸磧西用清風教

七載五月詔曰古者鄉有塾黨有序所以明尊卑之儀正長幼之序風化之道義在於此先置鄉學務令敦勸如聞郡縣之間不時訓誘閭巷之內多虧禮節致使言詞鄙褻少長相陵有玷清猷何成雅俗自今已後宜令郡縣長官申明條式切加訓導如有禮義興行及綱紀不立者悉採訪使明為褒貶具狀聞奏又詔曰式閭表墓追賢紀善事有勸於當時義無隔

異代其忠臣義士孝婦烈女史籍所載德行顯高者所在亦置一祠宇量事致祭

十三載二月詔曰厚其風俗五教之旨聿興責於巨圉十翼之風斯在其士庶間衆推孝弟累代義居高尚確然隱遁岩穴者委採訪使博訪聞薦其孝義之人已經旌表雍睦無易純至有終著美鄉閭深可嘉尚各賜勳兩轉

肅宗初卽位詔孝子順孫義夫節婦旌表其門閭至德三年二月大赦詔天下孝義門各與一子官委採訪使其名聞秦量文武處分自逆賊已來有匹夫

匹婦節義可量者並旌表其閭墓

乾元元年四月詔百姓中有事親不孝別籍異財玷
汚風俗虧敗名教先決六十配隸磧西有官品者禁
身聞奏

十月詔天下義夫節婦孝子順孫旌表門閭終身不
事

上元元年閏四月詔義夫節婦孝子順孫旌表門閭
終身不事

二年九月詔義夫節婦孝子順孫旌表門閭終身勿
事

三年建卯月辛亥詔孝子順孫義夫節婦旌表門閭
終身勿事

代宗寶應元年四月即位五月詔孝悌力田諸州刺
史宜搜揚闕薦

二年七月詔孝悌力田本州各以名薦

廣德二年二月乙亥詔孝子順孫義夫節婦旌表門
閭終身勿事

大曆元年十一月詔孝悌力田未經薦用者委所在
官長具以名聞

五年六月詔孝子順孫義夫節婦事迹明著者特加

旌表

德宗貞元四年詔孝悌力田聞於鄉里所在官長具名聞

順宗以貞元二十一年正月即位二月詔曰孝子順孫義夫節婦旌表門閭重加優卹

四月又詔天下孝子順孫先旌表門閭者委所管州縣各加存卹

憲宗元和四年十月册皇太子大赦詔孝子順孫先旌表門閭者委所管州縣各加存卹

七年十月詔天下孝子順孫先旌表門閭者委所管

州縣各加存卹

穆宗長慶元年三月幽州劉總歸闕詔管內有節義因事亡歿者量加追贈

七月詔孝子順孫義夫節婦事迹彰顯為眾知者量加存卹

昭宗天祐元年詔應天下有孝子順孫義夫節婦事迹彰顯為眾所知者仰所在長吏標錄聞奏旌表門

閭哀帝天祐四年四月詔孝子順孫義夫節婦有司以

名聞必當旌表

後唐莊宗同光元年四月卽位制曰鄉里有孝子順孫義夫節婦委所在長吏錄其節行以具奏聞盡據典章必行旌表教之為本義禮是先德之所宗昭本在上其民間有曾經三世以上不分若者並與蠲免諸雜差徭

十月詔其有義夫節婦孝子順孫並宜旌表門閭量加賑給

二年二月詔曰義夫節婦孝子順孫並合搜揚以行旌表

明宗天成二年十月辛丑詔許國之心忠貞為本承

家之法孝友為先應天下有孝子順孫義夫節婦兄弟繼世義居者隨處長吏聞奏當行旌表

三年八月帝聞隨鄧復郢均房之間父母骨肉有疾以竹竿遙致粥食於病者之側出嫁女父母有疾夫家亦不令知聞哀始奔喪者勅曰萬物之中人曹為貴百行之內孝道居先凡戴比辰並遵皇化備聞南土多喪時風皆傾事鬼之心不守敬親之道於父母如此無行被日月何以立身弊久積於鄉閭化全錄於長吏昔西門豹一縣令耳尚能投巫百姓保女子之愛絕河伯之虞斷自一時傳於千古况位居侯伯

化洽封廵豈不能宣北闕之風變南方之俗宜令隨處觀察使刺史丁寧曉告自今後父母骨肉有疾者並須日夕專切不離左右看侍使子奉其父母婦事其舅姑弟不慢於諸兄姪不怠於諸父如或不移故態老者臥病少者不勤侍養子女弟姪並加嚴斷出嫁女父母有疾不令其知者當罪其夫及舅姑

四年三月中書奏孔子有言曰教以孝所以敬天下之爲人父者教以悌所以敬天下之爲人兄者教以忠所以敬天下之爲人君者往聖深旨中古明規方當孝理之朝尤重人倫之本今後群臣內有乞假觀

省者欲請量賜茶藥所貴勸人之善表王之恩誠有益於皇猷且無損於國勢况在班行有父母者甚少既資風化動挂宸衷從之

長興二年八月壬申勅朕聞教化之本禮讓爲先欲設規程在循典故益以中興之始兆庶初安將使知方所以漸誘准儀制令道路街巷賤避貴少避長重避輕去避來有此四事承前每於道途立碑刻字令路人皆得聞見宜令三京諸道州府各遍下管內縣鎮准舊例於道路明置碑雕刻四件事文字兼於要會坊門及諸橋柱刻碑曉諭路人委本縣所繇官司

共切巡察有敢犯者科違勅之罪貴在所為簡易所
化弘多既禮教興行則風俗淳厚庶皆順序益致和
平

晉高祖天福元年閏十一月壬午勅義夫節婦孝子
順孫委逐道奏聞當加旌表

六年八月詔孝子順孫義夫節婦並與旌表門閭

少帝以天福七年六月卽位七月制曰敦崇孝義旌
表門閭式恢王化之基用正人倫之本應有孝子順
孫義夫節婦委逐處長吏具名奏聞當議旌表

漢高祖乾祐三年正月制義夫節婦孝子順孫併具

奏聞卽議旌表

周太祖廣順元年正月卽位制曰孝子順孫義夫節
婦所宜旌表以勵時風

二年十一月丙子詔曰應内外文武臣僚幕職州縣
官舉選人等今後有父母祖父母亡歿未經遷葬者
其主家之長不得輒求仕進所繇司亦不得申舉解
送如是卑幼在下者不在此限

顯德元年正月詔曰應孝子順孫義夫節婦州縣以
名聞者並與旌表門閭

世宗以是月丙申卽位三月詔曰其有孝子順孫義

冊府元龜 興教化 卷之六十一
夫節婦所宜旌表以厚人倫

冊府元龜

淮南李嗣京參閱

西極文翔鳳訂正

豫章黃國琦較釋

帝王部

六十一

立制度

聖人體國經野設官分職制作法度綱紀生民三代已還詳於典禮兩漢而降布在簡編故有制爵祿以懋功庸定車服以辨名數設關梁之禁以譏乎姦立符契之規以謹乎信著休息之令以休息官司定喪

紀之宜以正雅俗酌民情而為之節緣世變而為之
文時被大中建茲彞憲上得其道下知其方尊國庇
民何莫繇此於戲傳云各不正則言不順言不順則
事不成又曰作法於京其弊猶貪然則王者之立制
也誠宜慎其名而慮其弊焉

漢高祖五年五月詔曰七大夫公乘以上皆高爵也

七大夫公大夫之爵七故謂之七大夫公乘第八爵也 諸侯子及其從軍歸者

甚高爵吾數詔吏先與田宅及所當求於吏者亟與

亟急也 爵或人君上所尊禮 爵高有國邑者則自君其

也 立吏前曾不為決 有辨訟及陳情者不早決斷 甚亡謂也異

日秦民爵公大夫以上令丞與亢禮 亢者當也言高下相當無所取

今吾於爵非輕也吏獨妄取此 於何取此輕爵之法 且法以有

功勞田宅 行獨付與也 今小吏未嘗從軍者多滿 多自滿足也

而有功者顧不得 顧反也若人反顧然 背公立私守尉長吏教

訓甚不善 守郡守也尉都尉也長令謂縣之長令也 其令諸吏善遇高爵

稱吾邑 稱繇副也 且廉問有不如吾詔者以重論之

八年二月令公爵非公乘以上毋得冠劉氏冠賈人

毋得衣錦繡綺縠絺紵罽罽操兵乘騎馬 賈人坐販賣者綺文繒也

即今之細綾也絺細葛也紵織紵為布及紋也罽織毛若今禍及毼輸之類也操持也兵凡兵器也乘駕

車也騎也 單騎也

十一年詔諸侯王得自除內史以下漢獨為置丞相
文帝二年九月初與郡守為銅虎符竹使符謂各分其半右留京師左以與之

十月詔曰朕聞古者諸侯建國千餘各守其地以時
入貢民不勞苦上下驩欣靡有違德今列侯多居長
安邑遠所食之地去長安遠吏卒給輸費苦而列侯亦無繇教

訓其民其令列侯之國為吏及詔所止者遣太子謂為卿大夫者詔所止時以恩愛見留

十一年三月除闕無用傳

景帝中六年五月詔曰夫吏者民之師也車馬衣服

宜稱稱其官也吏六百名以上皆長吏也長大也六百石位大夫亡

度者或不吏服出入閭里與民亡異令長吏二千石

車朱兩轎據許慎李登說轎車之敝也左傳云以蕃載鄒櫟盈卽是有鄒櫟之車也千石

至六百石朱左轎車騎從者不稱其官衣服不吏出

入閭巷亡吏體者二千石上其官屬三輔舉不如法

令者謂主爵中尉及右內史也皆上丞相御史請之先是吏多軍

功車服尚輕故為設禁

武帝征和二年初置城門屯兵更節加黃旄以戾太子發節以戰故加其上黃以別之

元帝初元五年冬從官給事宮司馬中者得為大父

母父母兄弟通籍 司馬中者宮內門也籍者為二尺竹牒計其年紀名字物色縣之官門案者相應乃得入也從官親近天子嘗侍從者皆是

哀帝綏和二年四月即位六月詔除任子令博士弟子父母死子寧三年

平帝元始三年夏安漢公奏車服制度吏民養生送終嫁娶奴婢田宅器械之品

後漢光武初伏波將軍馬援上書曰臣所假伏波將軍印書伏字犬外嚮城臯令印臯字為白下羊丞印四下羊尉印白人下人下羊即一縣長吏印文不同恐天下不正者多符印以為信也所宜齊同薦曉古

文字事下大司空正郡國印章奏可

建武中杜詩為南陽太守初禁網尚簡但以璽書發兵未有虎符之信詩上疏曰臣聞兵者國之凶器聖人所慎舊制發兵皆以虎符其餘徵調竹使而已符第合會取其大信所以明著國命歛持威重也間者發兵但用璽書或以教令如有姦人詐偽無繇知覺愚以為軍旅尚興賊虜未殄徵兵郡國宜有重慎可立虎符以絕姦端昔魏之公子威傾憐國猶假兵符以解趙圍若無如姬之化則其功不顯事有煩而不可省費而不得已蓋謂此也書奏從之

和帝元年六月巳酉初令伏閉盡日漢官舊儀曰伏日萬鬼行故盡日閉不干它事

安帝元初三年初聽大臣二千石刺史行三年喪文
遺詔以日易月於後大臣遂以為至此復遵古制也

建光元年復斷大臣二千石以上服三年喪

桓帝永興二年二月初聽刺史二千石行三年喪服

永壽二年春正月初聽中官得行三年服中官常侍以下

魏明帝以公卿黼黻衮衣之飾擬於至尊多所減損始制天子服刺繡文公卿服織成文及帝受命遵而無改

晉武帝泰始三年初令二千石得終三年喪

太康四年制依漢故事給九卿朝車駕四及安車各

一乘

七年始制大臣聽終喪三年先是鄭默拜太鴻臚遭母喪舊制既喪還職默

遂自陳懇至久而見許遂改法定令聽大臣終喪自默始也

後魏明元永興三年詔侍臣嘗帶劍

孝文延興二年五月詔軍警給雀印傳符決給馬印

太和十年四月始制五等公服

十七年九月詔廝養之戶不得與士民婚有文武之才積勞應進者同庶族例聽之

十八年十二月革衣服之制

十九年九月丁亥詔曰諸有舊墓銘記見存昭然為人所知者三公及位公者墓三十步尚書令僕九列十五步黃門五較十步各不聽墾

二十年二月壬寅詔自非金革聽終三年喪

宣帝景明四年閏九月禁大司馬門不得車馬出入

孝明孝昌元年十一月辛亥詔曰大孝榮親著之昔

典故安平菴耆諸子滿朝

臣欽若等曰晉安平王手年九十三有九子

自

今諸有父母年八十以上者聽居官祿養溫清朝夕

孝莊建義元年五月詔以舊叙軍勲不得過征虜自

今以後依前式以上餘階積而為品其從輿駕北來之徒不在此例悉不聽破品受階請帛

後周武帝保定四年三月初令百官執笏

建德二年六月諸詔軍符旗皆畫以猛虎鷲鳥之象

三年正月初服短衣

四年四月初令上書者並為表於皇太子以下稱啓

六年九月初令民庶以上唯聽衣綢綿絲布絹綾紗

絹縑葛布等九種餘悉停斷朝祭之服不拘此例

宣政元年三月初服當冠以皂紗為之加簪而不施

纓遵其制若今之折角巾也

四年四月乙亥勅總管刺史父母及子年十五以上

不得將之官

九年四月頒木魚符於總管刺史雌一雄一

十年十月頒木魚符於官五品以上

十五年五月制京官五品以上佩銅魚符七月制九

品已上官以理去職者聽並執笏

十六年六月辛丑詔九品以上妻五品以上妾夫亡

不得改嫁

十七年頒銅虎符於驃騎車騎府

煬帝大業五年二月庚子制魏周官不得為蔭六月

壬戌制父母聽隨之官

六年詔從駕步遠者文武官等皆戎衣貴賤異等雜

用五色五品以上通著紫袍六品已上兼用緋綠百

吏以青庶人以白屠商以皂士卒以黃

唐高祖初為唐王頒銀兔符於諸郡

武德元年九月收銀兔符為銅魚符

二年二月詔文官遭父母喪聽去職

先是帝從容謂侍臣曰隋末以

來多有叛逆從坐之罪所及便多人有子姓皆令外
繼簿籍雖別居處猶同至有無其人妄為承嗣非直
誣罔鬼神且亦棄同即異非朕興化之意也有如此
輩即令正之尚書左丞崔善為進曰欲求忠臣必於

孝子比爲時多金革頗違墨經之義丁憂之士例從起服無識之輩衣冠以變無復戚容飲會之時燕啖自若如不糾劾恐傷風俗高祖曰旣奪其情安可責其卒禮

七年四月詔遭父母喪者聽終制

太宗貞觀元年十一月己未制子弟年十九以下聽隨父兄之官

四年八月丙午詔曰車服以庸昔王令典貴賤有節禮經彛訓自末代澆浮采章訛雜卿士無高卑之序兆庶行僭侈之儀遂使金玉珠璣靡隔於工賈錦繡綺縠下通於皂隸習俗爲嘗流遁亡反因循已久莫能懲革朕繼踵百王欽承寶運思弘典制垂範後昆

永鑒前失義存釐改其冠冕制度已備令文至於尋嘗服飾未爲差等今已詳定具如別式宜卽頒下咸使聞知於是三品已上服紫四品以下服緋六品七品以綠八品九品以青婦人從其夫也

八年四月帝初服翼善冠賜貴臣進德冠因謂侍臣曰幘頭起周武帝蓋取於軍容耳今海內無虞當息武事此冠頗採古法無類幘頭迺宜嘗服可與袴褶通用

十一年二月丁巳詔曰佐命功臣義深舟楫或定謀帷幄或身摧行陣同濟艱危克承鴻業追念在昔何

日忘之使逝者無知咸歸寂寞若營魂有識遠如疇曩居止相望不亦善乎漢民使將相陪陵又給以東園秘噐篤忠之義恩意深厚古人之志豈異我哉自今已後功臣密戚外德業尤著如有薨亡宜賜塋地一所及其秘噐使其窀穸之時喪事無闕所司依此營備稱朕意焉

十月癸丑詔曰乾坤合德爰著易簡之功君臣一體克成中和之治遠取諸物若舟楫之濟巨川近取諸身猶股肱之載元首同心叶契存歿以之故諸侯列塋周文始創其禮大臣陪陵魏武重申其制去病佐

漢還奉茂鄉之塋夷吾相齊終托牛山之墓茲益往聖垂範前賢遺則錄曩昔之宿心篤始終之大義者也皇運之初時逢交喪掃除多難光啓鴻業謀臣武將競進韓門之前明德異才爭趨魏闕之下或雲雷伊始功參締構或光華在旦績著弼諧及密戚懿親舊齒宿德委質先朝特蒙故遇者自今已後身薨之日所司宜卽以墓地並給東園秘噐事從優厚庶敦追遠之義以申罔極之懷

二十二年癸卯令百僚朔望袴褶以朝
高宗永徽二年四月開府儀同三司及京官文武職

事四品五品並給隨身魚
三年二月帝以天下無虞百姓務簡每至旬暇百寮許不視事

五年八月己未詔五品已上薨卒者隨身魚不必追收

顯慶元年四月制文武官人五品以上老及病不因罪解者並聽同致仕例

龍朔二年六月乙丑初令僧尼道士女冠等致敬父母

咸亨三年五月始令京四品五品職事佩銀魚袋

上元元年八月戊戌詔一品已下文官並帶手巾筭

袋刀子磨石其武官欲帶手巾筭袋者亦聽文武官

三品已上服紫金玉帶四品服深緋金帶五品服淺

緋金帶六品服深綠七品服淺綠並銀帶八品服深

青九品服深青並鑰石帶庶人服黃銅鈇帶先是九

品已上入朝參及視事聽兼服黃雘陽尉柳延夜行

為部人所歐帝聞之以章服錯亂下詔申明之自此

朝參行列一切不許著黃

辛丑詔公私齋會及參集之處道士女冠在東尼

在西不須更為先後

三年閏三月詔曰制勅施行既為永式比用白紙多有蟲蠹自今以後尚書省頒下諸司諸州及下縣宜並用黃紙其承制勅之司量為卷軸以備披簡

中宗神龍二年八月制京官五品已上依舊式佩銀魚袋

九月戊辰詔停京官六品已下著緋袴褶今各依本品為定

景龍元年十月勅宮殿門皇城門京城門禁苑門左右內外各給交魚符一合巡魚符一合左廂及開門魚一合右廂給開門魚一合左符付監門掌交番巡

察每夜並非時開閉則用之

睿宗景雲二年四月制九品以上一品已下文武依上元故事帶手中筭袋武官威帶七事鞞鞬並足其腰帶一品已下五品已上並用金六品七品並用銀八品九品共用鑰石魚袋著紫者金帶著緋者銀袋
玄宗先天二年三月癸巳詔制勅表狀書奏牋牒年月等數作一十二三十四十字
開元二年閏二月癸亥令道士女冠僧尼致拜父母
三月癸卯詔曰章服所施貴賤攸別苟容僭越未為獎勵承前諸軍人多有緋及魚袋者軍中卑品此

色甚多無功賞借深非道理宜勅諸軍鎮但是從京借魚袋及無灼然功者軍中權借者並委州軍長官勅到並卽收取待立功日據功合得卽將已上者委軍將先借後奏其靈武和戎大武幽州鎮軍赤水河源瀚海安西定遠等軍旣臨賊衝事籍懸賞量軍大小各封賞金魚袋五十枚並委軍將臨時行賞

七月戊戌詔曰雕文刻鏤衣紕履絲習俗相誇殊重競爽傷風敗俗爲弊良久珠上錦繡旣令禁斷惟大

三品已上飾以玉四品以上飾以金五品已上飾以銀者宜於腰帶及御盞酒杯杓依式自外

婦人衣服各隨其夫子其已有錦繡衣服聽染爲皂成段者官爲市取天下更不得採取珠玉刻鏤器玩造作錦繡珠繩織成帖繙二色綾綺羅作龍鳳禽獸等異文字及堅攔錦文者決杖一百受僱工匠降一等科之兩京及諸州舊有官織錦坊悉停是月又詔京官所帶跨巾筭袋每朝參日著外官牙日著餘日停

五年九月戊申詔曰君臣之間不當有隱敷納之事必在無私比年百司及諸使奏陳皆侍仗下頗乖公道須有革正自今已後非灼然秘密不合彰露者並

令封狀奏如文書浩大事理交雜者仍進先狀其史官自依舊例

六年七月庚申詔曰有司及奏事皆合對狀公言比日已來多仗下獨奏宜申明舊式詰語令知如緣曹吏司細務及有秘密不合對仗奏者聽仗下奏

十二年詔曰朱紫貴服所以分別班品自非有德有功不可輕爲賞借自今已後諸軍節度大使灼然有知功勞須權行給賞任量借色及魚袋仍具狀奏

十二年詔有司試天下僧尼年六十已下者限落者退還俗不得以坐禪對策儀試諸寺三階院通入大

院不得有異

十七年八月戊辰詔曰僧尼數多踰濫不少先經磨勘欲令真僞區分仍慮猶有非違都遣括檢聞奏憑此造籍以爲準繩如聞所繇條例非愜致姦妄轉更滋生因卽舉推罪者使衆宜依開元十六年舊籍爲之更不須造寫自今已後綱維大德侍養權隸不得輒于外取

二十一年七月詔曰道教釋教其來一體都忘彼我不自貴高近者道士女冠稱臣子之禮僧尼企踵勤誠請之儀以爲佛初戒度付囑國王猥當負荷願在

宣布蓋欲崇其教而先於朕者也自今已後僧尼一依道士女冠例無拜其父母宜增修戒行無違僧律興行至道俾在於此

二十二年諸道採訪使華州刺史李尚隲等奏請各置印從之

二十三年六月吏部尚書李昂奏曰伏見告身印與曹印文同形同參雜難以區分望請准司勳兵部印文中加告身兩字許之

二十四年二月壬戌許寒食通清明四日爲假

二十五年五月丙子詔曰緋紫之服班命所崇以賞

有功不可踰濫如聞諸軍賞借人數甚多曾無甄別

是何道理自今已後除灼然有戰功餘不得輒賞

十一月丁亥御史大夫李適之奏曰臣伏以朝服准式皆合備具比來有稱慘故式致乖踈臣望自今已後每當正止及緣大禮應朝官并六品清官並服朱衣餘六品已下望許通著袴褶朔望日請依舊文武官朝集使並服袴褶如有慘故准式不合著朱衣袴褶者其日聽不入朝自餘應合著不著者請奪一月俸以懲不恪其蕃官望不在此限如情愿著者請聽餘望依今式許之

天寶元年正月一日改元詔曰文宣垂訓事必正名而黃鉞古來以金為飾金者應五行之數有肅殺之威去金稱黃理或未當其黃鉞宜改為金鉞副威武之義焉

三載九月詔曰頃叙功勞累增勳級上在國外許及周親是謂賞延載榮宗族迴充賜物匪厚朝恩其准格上在國外有餘勳迴授周親

五載六月勅三伏內令宰相辰時還宅

七月勅應綠玉璽及符璽既改為寶其璽書宜改為

寶書

秦有符璽今歷代遵之唐長壽中改為神璽傳國及六璽並為寶神龍初復為璽開元初又改

也

六載六月詔曰立身揚名所以廣孝流根自葉亦在推恩既切因親之心須開議事之制其内外文官五品已上官父祖無資蔭者其所用蔭宜同子孫用蔭之例五服之紀宜所致及三千之屬以報免懷齊斬之殊雖存出母之制顧復之慕何申有子之思其出嫁母宜終服三載又詔曰重門夜開以達陽氣群司朝宴樂在時和屬此上元當修齋籙其於賞會必備葷羶比來因循稍將非便自今已後每至正月改取十七十八十九日夜開坊市門仍永為嘗式

七載正月太嘗卿韜奏御案禱牀帷等望去紫用赤黃從之

十載正月詔曰禮之王制垂範作程亦既觀德訓人孝敬故天子七廟諸侯五廟大夫三廟士一廟孝享奉先禮文有辨令三品已上乃許立廟永言廣敬載感于懷其京官正員四品清望官及五品清官並許立私廟是載改傳國寶為承天大寶
代宗寶應二年三月戊子有司奏中書門下五品官准式賜物並同四品及叙三品即不需恩並御史中丞自今已後望許叙名從之

廣德二年二月戊午詔曰二年之喪謂之達禮自非金革不可從權其文官自今已後並許終制一切不得輒有奏請

大曆七年秋七月壬辰勅中元前一日後一日宜准舊例並休假

十三年詔自今已後寒食通清明休假五日
德宗貞元三年十月復降魚書停刺史務之令

准令刺史
停代皆降魚符合之然後命自至德以來多不施行又即將估權代刺史悉稟其教令魚符廢及是漳州刺史坐事將鞠之有司復請降魚書停務從之求其書式不獲乃劄魚書曰勅漳州緣刺史張孫有犯令遣監察御史蘇弁往彼停務問推宜知

四年正月乙卯詔曰嘗參官比來請假東都拜掃多廢曠職事任遣子弟以申情禮

五年正月乙卯詔曰四序嘉辰歷代增置漢崇上巳晉紀重陽或說禳除雖因舊俗與眾共樂誠洽當時

朕以春方發生候及仲月勾萌畢達天地和同俾其昭蘇宜助暢茂自今宜以二月一日為中和節以代

正月晦日備三令節之數內外官司休假一日於是宰臣李泌奏中和節請令文武百僚以是日進農書

司農獻種稑之種王公戚里上春服士庶以刀尺相問遺村社作中和酒祭勾芒以祈年穀從之

六年三月丙午加寒食假寧七日

八月初造藍田渭橋等鎮過使印凡二十三紐九月初收諸道進奏院官印三十紐悉碎之

七年三月初賜節度觀察使新制時服帝方織作呈閣所宜帝曰頃來賜衣文綵不嘗非制也朕今思之

節度使以鵠銜綬帶取武毅以靖封內觀察使以鴈銜儀委取其行列有序牧人有威儀也儀委瑞草也瑞憲圖云王

者愛人則瑞草生也十一月令嘗參官入閣不得奔走其周已下喪朝會

禁慘服俄又命服衣綾袍金玉帶初金吾將軍沈房有弟喪衣慘服入

閣帝問宰相董晉等對曰准式許周以下服纓不合衣淺色帝曰南班何得有之曰因循而然又問冠冕之制曰古之服冠冕者動有珮玉之嚮所以飾步也夫至敬之地步武有嘗不趨而奔致僇君前虧敬也也在朝武士袍以綾五品已上帶服金玉取其文綵畫飾以奉上也是以禹惡衣服而致美乎黻冕君親一致昔尚書郎含香老萊子綵服皆此義也服純纓非制也帝乃詔各從舊制

八年五月初令授臺省官者各具舉主於授官詔

先

郎官缺左右丞舉之御史缺大夫中丞舉之詔書不其所舉及趙景陸贄為相建議郎官不宜專于左右丞宜令尚書及左右丞侍郎各舉其可詔書著其所舉官名御史亦如之具日考殿最以觀舉主能否從之未幾皆不行

閏十二月門下省奏郵驛條式應給紙券除門下外

諸使諸州不得給往還券至所詣州府納之別給券

假還其嘗參官在外除授及分付假寧往來並給券從之

十年二月詔曰君臣之際義莫重焉每聞薨殂深用

惻悼宜厚哀榮之禮以申終始之恩文武朝臣有薨

卒者自今已後其月俸料宜全給仍更准本官一月

俸料以為贈若諸司三品已上官及尚書省四品官

仍令有司舉舊令聞奏行吊祭之禮務從優備用稱

朕懷

初左庶子雷威以是月朔卒有司以故事計其月俸以日數給之帝聞之故有是命以廣恩澤無幾有致仕官卒者有司以官雖致仕而朝朔望請悉同正官卒者給贖從之

三月初置司封司勳考功甲庫印各一

十一年二月置度支水運供軍印

四月勅書賜南詔異牟尋及子各勸清平官鄭廻尹求寬等各一書書左始引中書二官宣奉行復舊制也五月初鑄河東監軍之印監軍有印自此始也

十三年七月宗正卿嗣吳王獻奏簡王府諮議參軍嗣寧王子淑墓請鹵簿宰臣等議以子淑官卑不合給特詔令給因下詔自今已後嗣王薨日宜令所司供鹵簿永爲常式

憲宗元和元年三月戊辰詔常參官寒食拜墓在京兆府界內者聽進止

八月甲申御史臺奏新授嘗參官在城未上及在外未到假故等准令式職事官假故滿百日卽令停解其未上官等並無正文武或滿百日無憑舉奏請自今已後如有在城授官疾病未上者在外授官勅到後計水陸程外滿百日者並停解從之

三年二月詔朝官寒食拜掃及出城任假內外來不須奏聽進止

四年三月監鐵轉運使李吳奏職兼兩使請各爲一印許之

五年四月庚寅御史中丞王播奏准故事御史到館

驛已處上廳中使後至即就別廳如中使先至御史亦就別廳近日多不遵守中使或不諳往例貴欲逾越御史若不守故事俱失憲章喧競道途深乖事體伏請各令遵奉故事異其守分制可其諸司三品官及中書門下尚書省官或出衙制命或入赴闕庭諸道節度觀察使赴本道及朝覲并前節度觀察使勅追赴朝廷者亦准此

先是監察御史元稹自東臺赴闕至敷水驛宿上廳中官仇士良後至爭廳門閉所入詰詈稹稹機而走廳後士良隨以鞭擊稹面傷遂兼以他生貶官臺司因請定制焉

六年十二月甲申詔立戟官中大夫守京兆尹上柱

國臨淄縣開國男賜紫金魚袋元義方朝議大夫守尚書戶部侍郎判度支護軍賜紫金魚袋盧坦立戟雖令式所著似有闕文而臺閣相承久為定制盧坦元義方如有所見即令上聞造次而行殊乖審慎宜各罰一月俸料其戟仍令所司收納左司郎中陸則勾簡之任發付不精禮部員外郎崔備工部員外郎元祐等或以禮許人或守官假器此於申請其過尤深各罰一季俸料緣兵興已來勳賞超越其所立戟須有明文宜令所司准舊制侍官皆勳至三品然後申請仍編於格令永為嘗式

近例立戟者率有銀青階而義方獨據令上柱

國官三品者十二戟無以階叙戟之文牒省司不能
 詣在式立戟之後轉為四品官者自非貶授兼判勳
 階其戟不奪既而盧坦以前任宣州刺史是三品兼
 護軍又請戟立已列於門議者以坦居四品官狀原
 無據臺司將劾而未舉吏部尚書鄭餘慶該練舊章
 至自東都揚言于朝以為大不可臺司因移牒詰禮
 部狀稱今文內只言勳官並不言階而自貞元以來
 立戟一十八家並無銀青色下階者遂以上聞故階
 坐罰而申之續放免陸則雀備元祐一月俸料甲申
 勅盧坦等所罰錢宜令部省收貯充省中修補已後
 別勅量罰並送都省貯每至歲終
 秦數其餘贓罰依前御史臺收管

七年十一月丁丑詔自今遇輟朝日申書門下宜同
 假日不須入

八年八月壬寅吏部奏請差定文武官告紙軸之物
 色五品已上用大花異文綾紙紫羅標檀木軸六品

已下朝官並內裝寫許與大花綾標餘小花綾紙通
 用紫綾標檀木軸命婦邑號許用色牋花素紙小花
 諸色錦標紅牙軸其紅地獨窠金錦線花牋紅花牙
 撥鏤鈿軸等除恩賜請並禁斷從之

九年十月戊辰以尚書左丞呂元膺為工部尚書充
 東都留守舊例命留守必賜旗甲與方鎮畧同及元
 膺受任竟無所賜朝論以東有寇虞時用元膺尤不
 當削以沮威望諫官上疏援華汝壽三州例賜戊械
 居守之重固宜寵賜帝曰此數處並不當與其後遂
 皆停

十三年八月乙亥詔應同司官有大功已上親者但非連判及勾簡之官並官長則不在迴避改授之限况國朝故事不少勅令明文具存其官署同職異司雖父子兄弟亦無所嫌起今已後宜准天寶二年七月六日勅處分時刑部員外郎楊嗣復以父於陵戶部侍郎遂以近例避嫌請出省宰臣等舉令式奏請故有是勅

十四年四月橫海軍節度使烏重胤奏臣以河朔能抗拒朝命者其大畧可見所管刺史失其權與職分反使鎮將領事若刺史各得職分又有鎮兵則節度使雖有安祿山史思明之姦惡豈能據一州為反哉

所以河朔六十年能不奉朝命者只以奪刺史權與縣令職守而自作威福臣所管德棣景三州已舉公牒各還刺史職事應在州兵并令刺史收管從之丙寅詔諸道節度都團練防禦經畧等使所管支郡除本州軍使外別置鎮遏守捉兵馬者並令屬刺史如刺史帶本州團練防禦鎮遏等使其兵馬名額便隸此使如無別使即屬軍事其有遶於溪洞接連蠻蕃之處特建城鎮不關州郡者則不在此限自艱難以來天下右武節將權尤重遂於所管諸郡別置鎮兵以大將至之干擾郡政或為姦盜其弊日久至是宰臣因烏重胤之請始奏罷之

穆宗元年正月卽位三月詔淄青統押海蕃每年皆有朝賀比差部領人數較多今寇盜旣夷典章須守宜以後差此官正試相兼不得過五人

六月賜河中節度使韓弘印一面先是皇甫鏘爲相頗排故相李絳罷河中節度使爲防禦使而命絳爲之至弘復授旌節而以印賜焉

七月平盧節度使奏准勅押加新羅渤海兩蕃請印一面從之

長慶二年八月勅秋夏之間嘗多水潦如綠暮夜遭雨道路不通車駕宜使放其日朝參委御史臺勾當仍每具聞奏如雨不至甚不在此例

三年五月秘書省監李隨奏請造當司圖書印一面從之

四年二月甲辰勅文武百僚寒食出城及於京畿內拜掃宜令自今月二十六日已後任去餘准長慶二年二月十四日勅處分

敬宗寶曆元年正月特建武昌軍額命宰相牛僧孺爲節度使丙辰牛僧孺請奏使印從之

立制度

册府元龜

淮南李嗣京奏閱

西極文翔鳳訂正

豫章黃國琦較釋

帝王部 六十一

立制度第二

唐文宗太和元年五月癸酉左神策軍奏當軍請鑄

南山採造印一面

二年六月四方館奏請賜印一面仍以中書省四方

館為名許之

三年十二月己未以董重質克神策諸道行營西川節度使奏請置印一面從之

四年六月飛龍廐襄城羣牧請鑄印可之

是月左右神策軍奏當軍於鳳翔扶風縣營田採造寶雞縣採造斜谷南山吳山寶雞扶風營田共四所各請鑄印並可之

五年四月內外各省使奏請鑄印從之

是月麟州刺史崔應奏刺史銅魚去貞元十七年蕃寇陷州城因以失墜自後刺史多是權知因循久不與請今請勅所司鑄賜從之

六年六月戊寅右僕射王涯准勅詳度諸司制度條件等禮部式親王及三品已上若二王後服色用紫飾以玉五品已上服色用朱飾以金七品已上服色用綠飾以銀九品已上服色用青飾以鍮石應服綠及青人謂經職事官成及食祿者其用勳官及爵直諸司依出身品仍各佩刀礪紛悅流外官及庶人服色用黃飾以銅鐵其諸親朝賀宴會服飾各依所准品諸司一品二品許服玉及通犀三品許服花犀及班犀及玉又服青碧者許通服綠餘請依禮部式諸部曲客女奴婢服通服青碧具命婦客女及婢聽同

庶人奴及部曲請許通服黃白皂其命婦准格客女及婢得同庶人其衣服婢及庶人女婦請兼許服夾纈丈夫請通服黃白如屬諸軍使司及屬諸道任依本色目流例其女人不得服黃紫爲裙及銀泥罨畫錦繡等餘請依令式其袍襖制度三品已上伏請許服鶻銜瑞草鴈銜綬帶及對孔雀綾袍襖四品五品伏請許服地黃花及交枝綾六品已上朝參官許服小團窠綾及無文綾隔織紗獨織等克除此色外應有奇文異制袍襖綾等並請禁斷其中書門下省尚書省御史臺及諸司三品官並請勅下後一月日改易

應諸嘗參官限勅下後兩月日改革餘非嘗參官並許五月日改革外州府以勅到日起限其衫布制度內外文武嘗參官及供奉官外州府四品已上官請許通服絲布仍不得有花紋餘請一切禁斷其花絲布及撩綾除供御外請委所在長吏禁毀訖當日聞奏其不合服絲布者請勅下後限一月日內並須改革丈夫袍襖衫等曳地不得長二寸已上衣袖不得廣濶一尺三寸已上婦人制裙不得濶五幅已上裙條曳地不得長三寸襦袖等不得廣一尺五寸已上婦人高髻險粧去眉開額甚乖風俗頗壞嘗儀費用

金銀過爲首飾並請禁斷其粧梳釵篋等伏請勅依
貞元中舊制仍請勅下後諸司及州府榜示限一月
內改革又吳越之間織造高頭草履織如綾縠前代
所無費日害功頗爲奢巧伏請委所在長吏當日切
加禁絕其諸綵帛縵或高頭履及平頭小花草履既
任依舊餘請依所司條流准儀制令諸軍一品已下
五品已上皆通幟六品已下皆不用幟者令非冊拜
及婚會並不用幟又准六典及禮部式諸文武赴朝
諸府遵從職事一品及開府儀同三司驃騎大將軍
聽七騎二品及特進五騎三品及散官三騎四品五

品兩騎六品已下一騎其散官及以禮去官五品已
上將從不得過兩騎若京城外將從不在此限今約
品秩職事官一品職七騎二品及中書門下三品五
騎三品及中書門下御史臺五品尚書省四品三騎
四品五品兩騎鞍通鍮石裝其散官及以禮去官者
五品已上不得過一騎若京城外及勲績顯著職事
繁重者不在此限七品已下非嘗參官並不得馬從
未任者聽乘屬馬鞍用烏漆裝右請一品二品九騎
三品七騎四品五品兩騎六品一騎其京城應繁重
者不在此限六品已下非嘗參官不得以馬從六品

已上非嘗參官周親未任者聽乘馬餘未任聽乘屬馬小馬鞍用烏漆裝其胥吏雜色人不在此限其鞍轡裝飾據所司條流得用銀者四品以下並得許用垂頭押勝其用銀鑰石者並不得用開裝其軍容隊伍要資華飾不在此限餘並依所司條流准少府式公主出降犢車兩乘一金銅裝郡主犢車兩乘一銅裝縣主犢車兩乘一銅裝又准鹵簿令外命婦一品厭翟車六乘二品三品白銅飾犢車一從車四乘四品白銅飾犢車一從車二乘者今此附前件令式參酌今時之宜婦人本來乘車近來率用檐子事已成

俗教在因人今請外命婦一品二品中書門下三品母妻金銅飾檐子昇不得過八人三品金銅飾犢車金銅飾檐子昇不得過六人非尚書省御史臺即白銅飾檐子昇不得過四人四品五品白銅飾犢車白銅飾檐子昇不得過四人六品已下畫奚車檐子昇不得過四人胥吏及商賈妻子並不乘奚車及檐子其老疾者聽乘葦輦步本及也車橫木二人庶人准此右伏緣白銅先已禁斷今請應合用銅者通用鑰石胥吏商賈妻女老疾者聽乘座車及葦輦車餘並請准所司條流處分商人乘馬前代所

禁近日得以恣其乘騎雕鞍銀鐙裝飾煥爛從以童騎聘以康莊此最爲僭越伏請切令禁斷庶人准此師僧道士除綱維及兩街大德餘並不得乘馬請依所司條流處分准營繕令王公已下舍屋不得施重拱藻井三品已上堂舍不得過五間九架仍廳厦兩頭門屋不得過三間五架五品已上堂舍不得過五間七架亦廳厦兩頭門屋不得過三間兩下仍通作烏頭大門勳官各依本品六品七品已下堂舍不得過三間五架門屋不得過一架兩下非嘗參官不得造軸心舍及不得施懸魚對鳳瓦獸通拱乳梁裝飾

祖父舍宅蔭子孫雖蔭盡仍聽依舊居住天下士庶公私第宅皆不得造樓閣臨視人家近者或有不守勅文因循製造自今已後伏請禁斷庶人所造堂舍不得過三間四架門屋不得過一間兩架下仍不得輒施裝飾准律諸營造舍宅于今有違者杖一百雖會赦皆令改正之其物可賣者聽賣若經赦後百日不改去及賣論如律又准大曆六年十二月十一日勅京城內坊市宅舍輒不得毀拆今若頓令改去恐爲倍費其已成者許不毀拆自今已後宜令禁斷應制度衣服車乘器用宮室等其諸軍諸使職掌官等

並請約文武官例各委本軍本使以職掌高下約爲等第比類聞奏應三省御史臺兩京諸司及諸道在城職掌官等諸不許用本官本品例仍並不得服犀玉及車馬不得飾以金銀應諸色條件伏請委御史臺知彈御史兩巡使京兆尹及東都留守河南尹留臺御史外州府長吏准條件月日切加糾察如有違越沒入所犯物仍量加決責其嘗參官品聞奏其在城諸軍諸使各委本司勾當如本司勾當不及者委臺司覺察聞奏以前臣涯等奉勅令臣等同爲詳定酌中奏聞者伏以法惟無作作則必行令貴在寬寬

則可久今臣等約所司條件令式舊章從俗酌宜務遵中道詔曰理道所關制度最切近者風俗踰侈歲月滋甚人隳本業用多費財爰命有司載舉彙制務從簡朴度可久行將使尊卑有倫刑罰少息其喪葬婚嫁吉凶禮物皆有著定尤聞僭差雖不在條件之物亦委所司准令式勾當仍切加捉搦不得輒有容縱軍國異容古今通禮禁軍仗衛雜飾及諸道節度等使應緣軍裝衣服卽不在此限或有留令慢法委御史臺彈奏當坐長吏用清頽風帝自御極躬自儉約將革奢侈之弊遂命有司示以制度勅下之後浮

議囂騰京兆尹杜棕於勅內條件易施行者奏請仍寬其限事竟不行公議惜之

八年八月乙酉詔嘗參官私事請假者罷給乘傳

九年三月庚午左丞陳敬休卒癸酉詔曰官至丞郎

皆朕所委不幸云亡宜其為之廢朝况朝會班列本

在諸司三品之上比限近勅或乖通理昨因敬休殞

喪載深傷惻自今丞郎宜准諸司三品官罷朝一日

九年甲子詔京諸司少卿監少尹等並大卿監大尹

分曹視事同禪大政河南太原等七州少尹及大都督府左右司馬諸州上佐等亦如之並從憲司之請

十二月勅創造諫院印一面以諫院之印為文諫院舊無

印苟有章疏各于本司請印諫官有印人多知之至是特勅置印兼詔諫臣凡所論事有關機密宜別以狀列之不須以官銜給署

開成元年五月集賢殿御書院請鑄小印一面以御書為文

二年十二月幽州節度使史元忠奏當管八州准門

下牒追刺史右魚各一隻臣勘自天寶末年頗有兵

戈並多失墜伏乞各賜新銅魚可之

三年四月中書門下奏宰相帶平章事出鎮請朝官為幕府自今已後不得過五人官至侍御史已上即

許兼奏章服從之

武宗會昌三年五月勅諸道節度使隨身不得過六十人觀察使不得過四十人經畧都護不得過三十人永爲定式

宣宗大中四年五月御史臺奏准今年正月一日節文今欲條流京百司見任官但請假往處計程限一月已上者便請從發日准節文逐貫尅二百文克給承後判察官如在一月內參假者不在此限從之五年正月中書門下奏加恩便請准會昌三年六月勅所受禮例不過三千疋仍請頒示天下諸道從之

哀帝天祐二年四月詔曰東上西上二閣門制置各別至於嘗事則以東上居先或大忌進名遂用西閣爲便同於禮式何表區分頃緣閣監擅權乃以陰陽取位不思南面但啟西門邇來相承未議更改詳其稱謂似爽規儀自五月一日已後嘗朝取東上閣門或遇忌日奉慰卽開西上閣門永爲定制

三年六月勅文武百寮每月一度入閣於貞觀大殿朝廷正衙遇正至之辰受羣臣朝賀比來視朔未正規儀今後於崇勳殿入閣付所司

後唐莊宗同光二年正月辛亥中書奏准本朝故事

如封建諸王內命婦及宰相翰林學士中書舍人諸道節度觀察團練防禦留後郎中書帖官告索綾紙票軸下所司書寫印署畢進入宣賜其文武兩班並諸道官員及奏薦將較勅下後並合是本道進奏院或本官自於所司送納朱膠綾紙價錢各請出給伏自偽廷嘗隳本朝事例每降文字下中書不分別重輕便令官給告示遂致所司公事全失規程自今後如非前件事例並請官中不給告示其內司大官並侍衛及賞軍功將較轉官卽不在此限所冀受宣賜者倍榮恩渥非事例者不敢希求一則致顯辨尊卑

一則免無名費耗從之

二月詔應於諸道見使斗秤並是偽朝所定宜令所司別造新朝斗秤頒下諸道具見使者納官毀廢八月中書奏偽廷之時諸藩參佐皆從除授自今後諸道除節度副使兩使判官除授外其餘職員并諸州軍事判官各任本處奏辟其軍事判官仍不在奏官之限所冀招延之禮皆合於前規簡辟之間無聞於濫舉從之

九月詔今後支郡公事須申本道本道騰狀奏聞租庸使合有徵催只牒觀察使貴全禮體

三年正月戊戌勅兵吏部以臺省禮錢爲名所司妄
有留滯在京者遽難應付外來者固是淹延須至條
流異絕訛弊自此後特恩授官侍衛軍功改轉內廷
諸司帶職外來進奉闕廷綾紙並宜官給無令收買
舊例朱膠一切停廢禮錢亦不徵取又慮所司因闕
人吏不辦食直糧課逐月兩司各支與錢四十貫文
至於臺省禮錢宜特蠲減比舊數五分許徵一分其
特恩已下並不得徵納禮錢仍令中書門下條流勅
畫經過諸司無至停滯其官告如是宣旨除授及品
秩合進呈者准例送回餘並送納中書門下點簡給

付勅書到本司十通已上官限三月內印署了三十
通已上限五日五十通已上中書門下與催促如臨
時緩急宣賜不拘此限少府監鑄造印文元屬禮部
兩司無有推注停滯諸道使臣廣徵銅炭價錢納後
別須邀索自此凡鑄印宜令本司限勅到五日內進
呈不計諸道在京並不得徵納銅炭價錢所破料物
並計數於租庸院請領仍預嘗給付價錢使盡計帳
于租庸院更請或有故違必行典憲

明宗天成元年七月辛未勅三京諸道節度團練防
禦使刺史文武將吏州縣職員皆進月旦起居表起

今已後除節度使留後團練防禦使唯正至進賀表其四孟月並可止絕式叶舊儀八月勅藩鎮幕職皆有舊規奏薦官寮須循前例苟或隳紊難止弊訛承前使府奏請判官率皆隨府除移府罷亦罷近年流例有異前規使府雖已除移判官原安舊職起今已後若是朝廷除授者卽不許使府除移如是使府奏請卽皆隨府移罷舊例藩侯帶平章事者所奏請判官殿中丞已上許奏緋中丞已上許奏紫令不帶平章事處亦同帶平章事例處分如防禦團練使奏請判官自員外郎以下不在奏緋之限其所奏判官州

縣官並須將歷任告身隨奏至京如未曾有官假稱試攝亦奏狀內分明署出如藩鎮留後及權知軍州事並不在奏請判官之限如刺史要奏州縣官須申本道請發表章不得自奏近日判官奏請從事本無官緒妄結虛銜不計職位高卑多是請兼朱紫不唯紊亂實故俸求宜令通下諸道州府切准勅命處分十一月甲戌吏部侍郎劉岳奏凡在立朝悉是爲臣之責每蒙進秩咸加報上之忠奉勅命以遷升固當感并降綸言而褒飾或未捧觀將使知罷陟之繇認訓誥之旨必在各頒官告令觀制詞處班列以增光

傳子孫而永耀伏請自今凡有除轉登朝官已上在京閣門宣賜在外則付本州使賜之勅旨朝官素有品秩不可一例頒宣文班三品已上丞郎給舍諫議武班大將軍已上宜賜官告舊例吏部出告身納出朱膠紙軸錢分給朝臣或親舊者隨卽給付而官貧不辦者但領勅牒而已喪亂之後因以為嘗朝臣多不出告身制下之後中書但收其制辭編為勅甲本官不見獎飭之詞故有是奏勅旨不編班得事體也其後執政者相與謀罷朱膠紙軸之例以為天下吏員無多除拜以簡給膠軸之費歲不過數萬國家既錫以祿位而邀其膠紙之直是巨細不相稱也因奏覆凡中外官除拜並宣賜官告然執政之議雖善蓋圖其始不料其終何者同光世至天成初官爵之命在於除授中外正員官其餘侍御帖號則寵徽軍中將較而已自長興已來除授日多上至軍中卒伍下迨州使鎮戎簿籍胥吏之流皆有銀青宮憲之號每歲給賜告身動盈數萬

非止膠紙之虛費財力而又賞激之道難以勸功以臣料終則知執政圖始之非善也勸作事謀始凡執政者慎圖之

二年正月詔曰亂離斯久法制多壞不有舉明從何禁止而衣服韉馬之流多踰品式起今後三京及州使職員名目是押衙兵馬使指揮使騎馬使得有暖坐諸部軍將衙官使下係名籍者只得依紫皂庶人商旅只著白衣此係不得參雜兼有富戶或投名於勢要以求影庇或希假攝貴免丁徭須議條流以懲踰越如有此色人仰所在禁勘追索所受文書申奏當行嚴斷以肅奸欺

四年正月申書奏凡外朝官此後並令中謝從之
長興元年七月勅諸道得替防禦團練等使及刺史
到京朝見後並宜班行比擬如未有員闕可令隨嘗
參官逐日至

十月給事中崔衍奏當省給納諸州銅魚勘問本行
令史狀稱內庫每州有銅魚八隻一隻大七隻小兩
隻右五隻左其右銅魚一隻長留在內留一隻在本
州庫逐季申報平安左魚五隻皆鐫次第字號每新
除刺史到郡後卽差人到當省請領左魚當司覆奏
內庫次第出給左魚一隻當省責領分付到州集官

吏取州庫右魚契合却差人送左魚納省如別除刺
史州司又請次第左右周而復始臣以州司差人請
魚往來須有煩費請此後所除刺史在京受命或經
過都城者可令自牒當省請左魚齎歸本郡契合然
後差人納省所與稍免煩勞從之

二年四月己巳勅朝臣居喪終制委御史臺具姓名
申奏諸道賓從除喪後各宜行恩命州縣官纔受新
命及到任一考前丁憂者服闋日除官

十月丙寅勅皇王御宇切在推恩臣下盡忠皆思勵
節顯祖宗於奕世耀妻子以榮家位有高低事無偏

立制度一
黨方當景運務洽羣心將弘莫大之規宜定維新之制自此在朝臣寮及藩侯郡守據理例合得追贈者新受命後便於所司投狀旋與施行封妻蔭子准格合得者亦施行兼自中興以來外官曾任朝班據在朝時品秩格例合得封贈叙封未霑恩命者並與施行其叙封妻室品蔭子孫等仍令所司一一具格式申奏其或應得而不與之者罪在所司官吏其餘進馬齋卽遇有員闕據資蔭合得先受官者先與收補後受官者據月日依次第施行如或徇私公然越次本人本司官吏當行責罰仍令御史臺嘗加訪察不

得輒有違越庶激爲臣爲子盡孝盡忠各守公方共禪皇化

三年正月戊申中書門下奏見任宰臣四員外其餘諸使兼侍中中書令平章事並是使相向來班序皆在見任宰臣之下今緣秦王從榮是親王新加兼中書令與諸使相不同每遇排班及到中書位次今特商議伏以政事之權雖崇四輔周行之列亦長諸王宜顯奉於本枝固不同於異姓今後望請親王官至兼侍中中書令則與見任宰臣分班定位宰臣居左諸王兼侍中中書令居右如親王及諸使守侍中中

書令亦竝是使相既不知印不署勅亦分行居右其餘使相請依舊規從之

壬子太嘗禮院奏衣服制度准

貞觀四年八月十四日詔曰冠冕制度已備令文藝嘗服飾未爲差等於是三品已上服紫四品五品已上服緋六品七品以綠八品九品以青婦人從夫之色仍通服黃至五年七月一日勅七品已上服龜甲雙巨十花綾其色綠九品已上服絲布及雜小綾其色黃又咸亨五年五月十日勅如聞在外軍人百姓有不依令式遂於袍衫之內着朱紫青綠等色短衫

襖子或在閭野公然露服貴賤莫辨有蠹葬倫自今已後衣服上下各依品秩上得通下下不得僭上仍令所司嚴加禁斷

又武德四年七月十六日制三品已上服大料細綾及羅其色紫五品已上服小料細綾及羅其色朱六品已上服絲布雜小綾交梭其色黃七品八品九品流外庶人服細綾純布其色黃白者又永徽三年八月十四日詔魚袋之制恩榮所加本緣品命帶魚之法事章要重者臣今詳酌本非朝命不得輒懸魚袋內外臣僚所衣朱紫服飾降於近代不越時宜將健

衣裝各立軍號當司從來無例檢詳其經商百姓等則不得著色樣綾羅及紫皂雜色衣服金色帶亦不載短長制度勅旨禮所奏內外臣僚所衣朱紫服飾不越時宜將健衣裝各立軍號一切仍舊其經商百姓不得著色樣綾羅及紫皂雜色衣服金色帶等宜依

四月甲寅勅諸道節度都護防禦團練等使及刺史到朝廷未有班位定規起今後不帶使相節度使班位可取使相班爲例據檢校官高者爲上如檢校同卽以先授者爲上其諸州防禦團練使刺史亦准此

仍前資居見任之下

愍帝應順元年三月故忠武軍節度使孟錫男遵古上言乞立先臣神道碑詔今後藩侯帶同平章事已上薨謝者並差官撰文宣賜未帶相印及刺史以令式合立碑者其文任自製撰不在奏聞

末帝清泰二年三月辛亥兩街功德使雍王重美奏每年誕節諸道州府奏薦僧尼道士紫衣師號漸多今欲量立條式僧講論講經表白各三科文章應制十二科持念一科禪聲贊科並於本伎能中條貫道士經法科試義十道講論科試經論文章應制科試詩

表白科試聲喉聲贊科試步虛三教焚脩科試齋醮儀詔曰重美學洞儒玄官居尹正因三教之議論希千春之渥恩特立條流以防濫進從之

晉高祖天福二年四月己亥詔今後立妃及拜免三公宰相及命將封親王公主宜令并降制命餘從令式處分甲辰中書奏以二月二十六日勅內外官臣僚亡父母祖父母據品秩未封贈已封贈三代者更加恩命按舊制一品官亡父已上三代約其子官品第降一等亡母追封國號祖母已上第降一等勅曰自家刑國歷代明規祖德宗功前王至訓在君上之

尊則異在臣下之孝皆同凡有公田竝立私廟自經多難不舉舊章今以應運開基體元布化不思奉已專務安人高低推念祖之誠內外保貽孫之慶其內外官等准勅合與三代已下封贈者竝以見居官品數比擬冀使人之例不輕王父之尊永載簡編普示孝理是月中書奏翰林志節文凡赦書德音立后建儲行大誅討拜免三公宰相命將日制竝使白麻紙不使印雙日起草候閣門之鑰入而後進隻日百僚立班於宣政殿樞密使引案自東上閣門出若拜免宰相卽委通事舍人餘付中書門下竝通事舍人短

步而宣出機要速亦使雙日甚者雖休假追朝而出之勅曰九五之尊億兆所賴法天敷化師古宣風宜循歷代之規以補前王之闕今據翰林志言立后不言立妃言儲君不言親王公主兼三師位在三公之上亦不在其間起今後立妃及拜免三公宰相及命將封親王公主宜令並降制命餘從令式處分

開七月壬申尚書戶部奏李自倫義居七世准勅旌表門閭先有登州義門王仲昭六代同居其旌表有廳事去欄前列屏樹烏頭正門閭闊一丈二尺二柱相去一丈柱端安瓦桶墨染號爲烏頭築雙闕一丈

在烏頭之南三丈七尺夾衝十有五步槐柳成列今舉此爲例則令式不該詔王仲昭正廳烏頭門等事不載令文又無勅命旣非故事難贖大倫宜從令式只表門閭於李自倫所居之前量地之宜高其外門門安掉楔門外左右各建一臺高一丈二尺廣狹方正稱臺之形勢以白泥四隅染赤其行列樹植隨其事力其同籍簿課役一准令式

十一月戊午中書奏准雜令卓駕巡幸所州縣官人見在駕所祇承賜會竝同京官可之

三年五月勅舊制內外臣僚據官品私門合立戟事

將相之崇朝廷所重竝輸忠節仰奉宗祧宜旌佐國之功顯示榮家之慶應中外臣僚帶平章事侍中中書令及諸道節度使並許私門立戟仍竝官給并各賜詔書仍據官品依令式處分

七月中書奏准勅製皇帝受命寶今按唐書貞觀十六年太宗刻受命玄璽白玉爲螭首其文曰皇天景命有德者昌勅曰受命寶宜以受天明命惟德允昌

爲文

按受命寶者天子脩封禪禮神祇則用之其始皆破皇業錢以製之皇業者藩邸王事之所有

七年二月甲辰勅應內外諸司諸使及諸道州府凡有諸色公事須具奏聞今後不得將白狀及劄子記

事申覆如事關機密卽准先降宣命寶封斜角不題事目通下其合申中書及中書勘會公事所申狀亦須是本司及逐處官員印署不得將白狀及記事劄子兼令司局抄劄供申宜令御史臺及宣徽院三司衛司諸道州府切准此指揮

少帝天福七年六月卽位九月勅曰留守之任委寄非輕凡降絲綸宜同將相起今後除授留守宜降麻制仍付所司

開運三年正月詔改鑄天下合同印書詔印御前印竝以黃金爲之

漢隱帝乾祐三年五月詔諸道州府差置散從官大府五百人上州三百人下州二百人勅本處團集官係立節級檢校教習以警備州城

周太祖廣順元年三月辛卯勅職當參佐位列賓僚苟無職馭之人頗異築臺之禮雖事因改易而理未酌中宜降明文庶永爲制副留守節度副使行軍兩京少尹留守判官兩使判命竝許差定當直人力不得過十五人節度推官防禦團練軍事判官不得過十人諸府少尹書記友使防禦團練副使不得過七人竝取本廳舊當職人力數少不及新定數目只俾

依舊人數差定仍令逐處係帳收管此外如敢不遵條制多有占差額外影占人戶其本官當行朝典漢隱帝時有人言府州從事令錄皆請料錢自合顧人驅使不合差遣百姓丁戶秉政者然之下詔州府從事令錄本處先差職役竝速放散歸農不得差爲參從貧官有獨行趨府者太祖頗知之故有是命三年七月丁酉勅賦稅婚田比來州縣之職盜賊烟火元係巡鎮之司各有區分不相踰越或侵職分是紊規繩切慮所在職員尚循舊弊須行條貫以正紀綱京兆鳳翔府同華邠鄜耀等州所管州縣軍鎮頃

因唐末藩鎮殊風久歷歲時未能釐革政途不一何以教民其婚田聽訟賦稅丁徭合是令佐之職其擒奸捕盜庇護部民合是軍鎮警察之職今後各守職分專切提撕如所職踈遺各行按責其州府不得差監徵軍將下縣庶期靜辨無使煩勞

世宗顯德四年七月甲辰詔曰准令諸田宅婚姻起十一月一日至三月三十日州縣爭論舊有釐革每至農月貴塞訟端近聞官吏因循繇此成弊凡有訴競故作逗遛至時而不與盡詞入務而即便停罷強滑者因此得志孤弱者無以自伸起今後應有人論

訴物業婚姻取十一月一日後許陳詞狀至二月三十日權停自三月三十日已前如有陳詞至權停日公事未了絕者仰本處州縣亦與盡理勘逐須見定奪了絕其本處官吏如敢違慢竝當重責其三月一日後至十月三十日前如有婚田詞訟者州縣不得與理若是交相侵奪情理妨害不可停滯者不拘此限

五年十月癸卯鑄奉使印五十面

六年三月癸酉勅銅魚之設雖載前編原其始初蓋防僞濫今諸道牧守每遇除移竝特降放制書又何

假於符契如聞請納頗是煩勞宜易前規罷茲虛器
其銅魚竝宜停廢

